

張仲景傷寒論貫珠集

張仲景傷寒論貫珠集目錄卷之五

辨列少陽條例大意

少陽正治法第一 計一十六條 方一道

少陽證一條

小柴胡湯證九條

小柴胡湯方

少陽汗吐下之禁二條

辨少陽邪氣進退之機四條

少陽權變法第二 計四條 方四道

柴胡桂枝湯證一條

柴胡桂枝湯方

柴胡桂枝乾薑湯證一條

柴胡桂枝乾薑湯方

柴胡加芒硝湯證一條

柴胡加芒硝湯方

大柴胡湯證一條

大柴胡湯方

少陽刺法四條

張仲景傷寒論貫珠集卷之五

飲鶴山人尤怡在涇註

陽少篇

辨列少陽條例大意

少陽居表裏之間當有膜之處外不及於皮膚內
不及於藏府汗之而不從表出下之而不從裏出
故有汗吐下之戒而惟小柴胡一方和解表裏爲
少陽正治之法凡十六條其次則有和解而兼汗
下之法謂證兼太陽之表則宜兼汗或證兼陽明
之裏則宜兼下如柴胡加桂枝湯柴胡加芒硝湯

大柴胡湯柴胡桂枝湯等方是也夫有汗下之禁而或汗之或下之此亦少陽權變法也凡四條又其次爲刺法如縱橫脇滿合併之病當刺期門大椎肺俞肝俞諸穴是也凡四條

少陽正治法第二 計十六條

少陽證一條

少陽之爲病口苦咽乾目眩也

足少陽膽也膽盛精汁三合而其味苦膽受邪而熱其氣上溢故口苦咽門者肝膽之候目銳眦者膽脈之所起故咽乾目眩也

小柴胡湯證九條

傷寒五六日中風往來寒熱胸脇苦滿默默不欲飲食心煩喜嘔或胸中煩而不嘔或渴或腹中痛或脇下痞硬或心下悸小便不利或不渴身有微熱或欬

者與小柴胡湯主之

傷寒五六日中風者言或傷寒五六日傳至少陽
或少陽本經自中風邪非既傷寒五六日而又中
于風也往來寒熱者少陽居表裏之間進而就陰
則寒退而從陽則熱也胸脇苦滿者少陽之脈其
直者從缺盆下腋循胸過季脇故也默默不欲飲
食心煩喜嘔者木火相通而膽喜犯胃也或者未
定之辭以少陽爲半表半裏其氣有乍進乍退之
機故其病有或然或不然之異而少陽之病但見
有往來寒熱胸脇苦滿之證便當以小柴胡和解

表裏爲主所謂傷寒中風有柴胡證但見一證便是
不必悉具是也 此條自太陽篇移入

小柴胡湯方

柴胡半劬 黃芩三兩 人參三兩 甘草三兩

生薑三兩 半夏半升洗 大棗十二枚擘

右七味以水一斗二升煮取六升去滓再煎取
三升溫服一升日三服

加減法

若胸中煩而不嘔去半夏人參加括葉實一枚

胸中煩而不嘔者邪聚於膈而不上逆也熱聚

則不得以甘補不逆則不必以辛散故去人參
半夏而加括蕢實之寒以除熱而蕩實也

若渴者去半夏加人參合前成四兩半括蕢根四
兩

渴者木火內煩而津虛氣燥也故去半夏之溫
燥而加人參之甘潤括蕢根之涼苦以徹熱而
生津也

若腹中痛者去黃芩加芍藥三兩

腹中痛者木邪傷土也黃芩苦寒不利脾陽芍
藥酸寒能於土中瀉木去邪氣止腹痛也

若脇下痞鞭去大棗加牡蠣四兩

脇下痞鞭音邪豕少陽之募大棗甘能增滿牡
蠣鹹能軟堅好古云牡蠣以柴胡引之能去脇
下痞也

若心下悸小便不利者去黃芩加茯苓四兩

心下悸小便不利者水飲蓄而不行也水飲得
冷則停得淡則利故去黃芩加茯苓

若不渴外有微熱者去人參加桂三兩溫覆取微
汗愈

不渴外有微熱者裏和而表未解也故不取人

參之補裏而用桂枝之解外也

若欬者去人參大棗生薑加五味子半升乾薑二兩

欬者肺寒而氣逆也經曰肺苦氣上逆急食酸以收之又曰形寒飲冷則傷肺故加五味之酸以收逆氣乾薑之溫以却肺寒參棗甘壅不利於逆生薑之辛亦惡其散耳

血弱氣盡腠理開邪氣因入與正氣相搏結於腸下正邪分爭往來寒熱休作有時默默不欲飲食藏府相連其痛必下邪高痛下故使嘔也小柴胡湯主之

服柴胡湯已渴者屬陽明也以法治之

血弱氣盡腠理開謂亡血新產勞力之人氣血不足腠理踈豁而邪氣乘之也邪入必與正相搏而結于脇下脇下者少陰之募而少陰者陰陽之交也邪氣居之陰出而與邪爭則寒陽入而與邪爭則熱陰陽出入各有其時故寒熱往來休作有時也默默不欲飲食義如上條藏府相連四句是原所以邪氣入結之故謂膽寄於肝地逼氣通是以其邪必從府而入藏所謂其痛必下也邪高謂病所來處痛下謂病所結處邪欲入而正拒之則必

上逆而嘔也至其治法亦不出小柴胡和解表裏之法服後邪解氣和日必不渴若渴者是少陽邪氣復還陽明也以法治之者謂當從陽明之法而不可復從小陽之法矣此亦從太陽篇移入傷寒四五日身熱惡風頸項強脇下滿手足溫而渴者小柴胡湯主之

此條雖以太陽與少陽併病以太陽不得有脇下滿少陽不得有頸項強且手足溫而渴知其邪不獨在表而亦在裏也欲合表裏而並解則非小柴胡不可耳亦太陽篇移入

傷寒中風有柴胡證但見一證便是不必悉具

柴胡證如前條所謂往來寒熱胸脇苦滿等證是也傷寒中風者謂無論傷寒中風有柴胡證者宜見一證便當以小柴胡和解之不可謂其不具而以他藥發之也前條云身熱惡風頸項強脇下滿者小柴胡不與桂枝卽此意亦太陽篇移入凡柴胡湯病證而下之若柴胡證不罷者復與柴胡湯必蒸蒸而振却發熱汗出而解

柴胡證不應下而反下之於法爲逆若柴胡證不罷者仍宜柴胡湯和解所謂此雖已下不爲逆也

蒸蒸而振者氣從內達邪從外出有戰勝之義焉
是以發熱汗出而解也 亦太陽篇移入

傷寒陽脈濇陰脈弦法當腹中急痛者先與小建中
湯不差者與小柴胡湯主之

陽脈濇陽氣少也陰脈弦陰有邪也陽不足而陰
乘之法當腹中急痛故以小建中湯溫裏益虛散
陰氣若不差知非虛寒在裏而是風邪內干也故
當以小柴胡湯散邪氣止腹痛 亦太陽篇移入
傷寒五六日頭汗出微惡寒手足冷心下滿口不欲
食大便秘脈細者此爲陽微結必有表復有裏也脈

沉亦在裏也汗出爲陽微假令純陰結不得復有外證悉入在裏此爲半在裏半在外也脈雖沉緊不得爲少陰病所以然者陰不得有汗令頭汗出故知非少陰也可與小柴胡湯設不了了者得屎而解

頭汗出微惡寒爲表證手足冷心下滿口不欲食大便鞭脈細爲裏證陽微結者陽邪微結未純在裏亦不純在表故曰必有表復有裏也傷寒陰邪中於陰者脈沉陽邪結於裏者脈亦沉合之于證無外證者爲純在裏有外證者爲半在表也無陽證者沉爲在陰有陽證者沉爲在裏也夫頭爲陽

之會而陰不得有汗今脈沉緊而頭汗出知其病不在少陰亦併不純在表故可與小柴胡湯合外內而并治之耳設不了了者必表解而裏未和也故曰得屎而解

本太陽病不解轉入少陽者脇下鞭痛乾嘔不能食往來寒熱尚未吐下脈沉緊者與小柴胡湯若已吐下發汗溫鍼譖語柴胡湯證罷此爲壞病知犯何逆以法治之

本太陽脈浮頭痛惡寒之證而轉爲脇下鞭滿乾嘔不能食往來寒熱者太陽不解而傳入少陽也

尙未吐下不經藥壞者脈雖沉緊可與小柴胡以和之以證見少陽舍脈而從證也或云脈沉緊連上未吐下看言尙未經吐下與脈未至沉緊者知其邪猶在經可與小柴胡以和之或云沉當作浮前陽明篇第四十八條云病過十日脈續浮者與小柴胡湯是也並通若已吐下發汗溫鍼齏傷津液胃燥譫語而脇下鞭滿乾嘔等證反罷者此衆法盡投正已大傷而邪猶不解謂之壞病非小柴胡所得而治者須審其因犯何逆隨證以法治之

少陽汗吐下之禁二條

傷寒脈弦細頭痛發熱者屬少陽少陽不可發汗發汗則譫語此屬胃胃和則愈胃不和則煩而悸

經曰少陽之至其脈弦故頭痛發熱者三陽表證所同而脈弦細則少陽所獨也少陽經兼半裏熱氣已動是以不可發汗發汗則津液外亡胃中乾燥必發譫語云此屬胃者謂少陽邪氣併于陽明胃府也若邪去而胃和則愈設不和則木中之火又將併入心蕪而爲煩爲悸矣

少陽中風兩耳無所聞目赤胸中滿而煩者不可吐下吐下則悸而驚

此少陽自中風邪之證不從太陽傳來者也少陽之脈起於目銳眦其支從耳後入耳中以下胸中少陽受邪壅熱於經故耳聾目赤胸中滿而煩也是不在表故不可吐復不在裏故不可下吐則傷陽陽虛而氣弱則悸下則傷陰陰虛而火動則驚辨少陽邪氣進退之機四條

傷寒六七日無大熱其人躁煩者此爲陽去入陰故也

邪氣在表則發熱入裏則躁煩傷寒六七日外無大熱而其人躁煩者邪氣去陽而之陰也去又訓

作往言陽邪往入陰中也

傷寒三日三陽爲盡三陰當受邪其人反能食而不嘔此謂三陰不受邪也

傷寒一日太陽二日陽明三日少陽四日當傳太陰內經傷寒傳變之常法然也陽邪傳陰則當嘔而不能食若其人反能食不嘔則邪氣不傳於陰將從陽而解也

傷寒三日少陽脈小者欲已也

傷寒三日少陽受邪而其脈反小者邪氣已衰其病欲解而愈經云大則病進小則病退此之謂也

少陽病欲解時從寅至辰上

少陽膽木也從寅至辰爲木旺之時故其病欲解必於是三時亦猶太陽之解於巳午未陽明之解於申酉戌也

少陽權變法第二 計四條

柴胡桂枝湯證一條

傷寒六七日發熱微惡寒支節煩疼微嘔心下支結外證未去者柴胡桂枝湯主之

發熱微惡寒支節煩疼邪在肌表所謂外證未去也傷寒邪欲入裏而正不容則嘔微嘔者邪人未

多也支結者偏結一處不正中也與心下鞭滿不同此雖表解猶不可攻況外證未去者耶故以柴胡桂枝合劑外解表邪內除支結乃七表三裏之法也

柴胡桂枝湯方

柴胡半兩 桂枝半兩 甘草一兩炙
黃芩半兩 人參半兩 半夏二合半
白芍半兩 生薑一兩半 大棗六枚擘
右九味以水七升煮取三升去滓溫服

柴胡桂枝乾薑湯證一條

傷寒五六日已發汗而復下之胸脇滿微結小便不利渴而不嘔但頭汗出往來寒熱心煩者此爲未解也柴胡桂枝乾薑湯主之

王叔和本在太陽篇中今移置此

汗下之後胸脇滿微結者邪聚於上也小便不利渴而不嘔者熱勝於內也傷寒汗出周身熱熱人靜不煩者爲已解但頭汗出而身無汗往來寒熱心煩者爲未欲解夫邪聚於土熱勝於內而表復解是必合表裏以爲治柴胡桂枝以解在外之邪薑牡蠣以散胸中之結括蕞根黃芩除心煩

而解熱渴炙甘草佐柴胡桂枝以發散合芍括萎薑囁以和裏爲三表七裏之法也

柴胡桂枝乾薑湯方

柴胡半觔 桂枝三兩 乾薑二兩 黃芩三兩

括萎根四兩 牡蠣三兩熬 甘草二兩炙

右七味以水一斗二升煮取六升去滓再煎取

三升溫服一升日三服初服微煩復服汗出愈

柴胡加芒硝湯證一條

傷寒十三日不解胸脇滿而嘔日晡所發潮熱已而微利此本柴胡證下之而不得利今反利者知醫以

丸藥下之非其治也湯熱者實也先宜小柴胡湯以解外後以柴胡加芒硝湯以治其裏也

此少陽經邪兼陽明內實之證少陽病在經故胸脇滿而嘔所謂柴胡證也下之而三字疑衍凡柴胡證不得利今反利者知醫以丸藥下之爲醫之誤非病之情也潮熱者陽明之實也實則可下而證兼少陽則不可下故先宜小柴胡以解其外後以柴胡加芒硝湯以治其裏亦如下條之先與小柴胡後與大柴胡之例也 亦太陽篇移入

尚從善云此本柴胡證下之而不得利仲景謂此

本柴胡證醫設以大柴胡湯下之則表裏俱解何至有下利之證云

柴胡加芒硝湯方 於小柴胡湯內加芒硝六兩餘
依前法服不解更服

大柴胡湯證一條

太陽病過經十餘日反二三下之後四五日柴胡證仍在者先與小柴胡湯嘔不止心下急鬱鬱微煩者爲未解也與大柴胡湯下之則愈

太陽病過經十餘日而有柴胡證乃邪氣去太陽之陽明而復之少陽也少陽不可下而反二三下

之於法爲逆若後四五日柴胡證仍在者先與小
柴胡湯所謂柴胡湯病證而下之若柴胡證不罷
者復與柴胡是也若服湯已嘔不止心下急鬱鬱
微煩者邪氣鬱滯於裏欲出不出欲結不結爲未
解也與大柴胡以下裏熱則愈亦先表後裏之意
也 此條自太陽篇移入

大柴胡湯方

柴胡八兩

半夏八兩

黃芩三兩

生薑五兩

枳實四枚

芍藥三兩

大棗十二枚擘

大黃二兩酒浸

右八味以水一斗二升煮取六升去滓再煎取
三升溫服一升日三服

按大柴胡有柴胡生薑半夏之辛而走表黃芩芍
藥枳實大黃之苦而入裏乃表裏並治之劑而此
云大柴胡下之者謂病兼表裏故先與小柴胡解
之而後以太柴胡下之耳蓋分言之則大小柴胡
各有表裏合言之則小柴胡主表而大柴胡主裏
古人之言當以意逆往往如此

少陽刺法第三

刺法四條

傷寒腹滿譫語寸口脈浮而緊此肝乘脾也名曰縱刺期門

傷寒發熱膏肓惡寒大渴欲飲水其腹必滿自汗出小便利其病欲解此肝乘肺也名曰橫刺期門

腹滿譫語裏之實也其脈當沉實而反浮緊則非裏實乃肝邪乘脾氣窒而熱也縱直也以肝木制脾土於理爲直故曰縱發熱惡寒表有邪也其病不當有渴而反大渴則非內熱乃肝邪乘肺氣鬱而燥也以裏無熱不能消水故腹滿而汗出小便利則肺氣以行故愈橫不直也以木畏金而反乘

金於理爲曲故曰橫二者俱瀉肝邪則愈故刺期
門期門肝之募也設不知而攻其實熱則誤矣此
病機之變不可不審也

太陽與少陽併病頭項強痛或眩冒時如結胸心下
痞鞭者當刺大椎第一節肺俞肝俞慎不可發汗發
汗則譫語脈弦五六日譫語不止當刺期門

太陽少陽併病心下鞭頸項強而眩者當刺大椎肺
俞肝俞慎勿下之

太陽之脈其直者從顛入絡腦還出別下項少陽
之脈起目銳眥上抵頭角其內行者由缺盆下胸

中貫膈絡肝屬膽故頭項強痛者太陽之邪未罷
或眩冒時如結胸心下痞硬者少陽之邪方盛也
大椎在脊骨第一節上刺之所以瀉太陽邪氣而
除頭項之強痛肺俞在脊骨第三節下兩旁肝俞
在第九節下兩旁刺之所以瀉少陽邪氣而除眩
冒時如結胸及心下之痞硬慎不可發汗以亡胃
液液亡胃燥必發譫語且恐少陽之邪得乘虛而
干胃也若脈弦至五六日譫語不止是少陽勝而
陽明負亦如陽明與少陽合病之爲失也故當刺
期門以瀉少陽之邪亦慎勿下之以虛其胃胃虛

邪陷必作結胸如本論云太陽少陽併病而反下
之成結胸也

張仲景傷寒論貫珠集目錄卷六

辨列太陰條例大意

太陰諸法 計十條 方二道

太陰藏病脈證治六條

桂枝加芍藥湯方

桂枝加大黃湯方

太陰經病證治二條

太陰經藏俱病證治一條

太陰病愈期一條

卷之八

目錄終

張仲景傷寒貫珠集卷之六

臥鶴山人尤怡在涇註

二然朱陶性校

太陰篇

辨列太陰條例大意

太陰者土也在臟爲脾在氣爲濕傷寒傳經之熱入而與濕相搏則爲腹滿吐利等證直中之寒入而與濕相搏亦爲腹滿吐利等證但有肢冷肢溫脈遲脈數口渴不渴之異耳又三陰爲三陽之裏而三陰亦自有表裏是以風寒所中不必盡入於臟而亦留連於經故有太陰中風之條與桂枝發

汗之法又下利腹脹滿身體疼痛者此爲經臟俱病之證故與先裏先表之法乃今之論三陰者但云直中傳經而已是知有三陰之裏不知有三陰之表也茲篇先列臟病次列經病又次爲經臟俱病凡十條爲一卷

太陰諸法

太陰藏病脈證治六條

太陰之爲病腹滿而吐食不下自利益甚時腹自痛
若下之必胸下結鞭

此足太陰病之的證也太陰之脈入腹屬脾絡胃
上膈俠咽故其病有腹滿而吐食不下自利腹痛
等證然太陰爲病不特傳經如是卽直中亦如是
且不特傷寒如是卽雜病亦如是但有屬陰屬陽
爲盛爲虛之分耳而太陰者藏也滿而不實法不
可下若下之則胸下結鞭中氣傷者邪氣必結也

本太陽病醫反下之因而腹滿時痛者屬太陰也桂枝加芍藥湯主之

病在太陽不與解表而反攻裏因而邪氣乘虛陷人太陰之位爲腹滿而時痛陶氏所謂誤下傳者是也夫病因邪陷而來者必得邪解而後愈而藏陰爲藥所傷者亦必以藥和之而後安故須桂枝加芍藥湯主之桂枝所以越外入之邪芍藥所以安傷下之陰也按金匱云傷寒陽脈清陰脈弦法當腹中急痛者與小建中湯不差者與小柴胡湯此亦邪陷陰中之故而桂枝加芍藥亦小建中之

意不用膠飴者以其腹滿不欲更以甘味增滿耳
桂枝加芍藥湯方 於桂枝湯方內更加芍藥三兩
隨前共六兩餘依桂枝湯法

大實痛者桂枝加大黃湯主之

此承上條而言腹滿而未實痛而不甚者可以桂
枝加芍藥和而解之若大實大痛者邪氣成聚必
以桂枝加大黃越陷邪而去實滯也夫大陰脾藏
也藏何以能實而可下陽明者太陰之表以膜相
連臟受邪而府不行則實故脾非自實也因胃實
而實也大黃所以下胃豈以下脾哉少陰厥陰亦

有用承氣法詳見各篇所當互考

桂枝加大黃湯方

桂枝三兩去皮 甘草三兩炙 大黃一兩

生薑三兩切 大棗十二枚 芍藥六兩

右六味以水七升煮取三升去滓溫服一升日

三服

太陰病脈弱其人續自便利設當行大黃芍藥者宜減之以其人胃氣弱易動故也

此亦承上條而言大黃芍藥之得以用者爲其胃實而便堅也若其人脈弱續自便利則雖有大實

痛證此法不可用矣卽欲用之亦宜量減而與之
所以然者胃氣弱而不振邪氣不聚而易動故可
以緩圖而難以峻攻也

傷寒脈浮而緩手足自溫者是爲繫在太陰太陰者
身當發黃若小便自利者不能發黃至七八日暴煩
下利日十餘行必自止以脾家實穢腐當去故也

傷寒脈浮而緩者脈緊去而成緩爲寒欲變熱之
證如太陽第四十七條之例也手足自溫非太陰
一定證見太陰有寒手足必寒有熱手足乃自溫耳
又陽明受熱則一身及手足熱太陰則身不熱而

手足溫茲寒已變熱而手足自溫則傷寒之邪不
之陽明而之太陰而其脈仍浮則其邪亦未盡入
故曰繫在太陰謂以太陽而內連太陰也於法太
陰受熱而汗不出者熱與濕搏當發身黃若小便
自利者其熱得通不能蒸鬱爲黃矣至七八日暴
煩下利者正氣內作邪氣欲去也雖日十餘行繼
必自止所以然者脾家本有穢腐當去故爲自利
穢腐盡則利亦必自止矣

自利不渴者屬太陰以其藏有寒故也當溫之宜四

逆證

自利不渴者太陰本自有寒而陰邪又中之也曰
屬太陰其藏有寒明非陽經下利及傳經熱病之
比法當溫藏祛寒如四逆湯之類不可更以苦寒
堅之清之如黃芩湯之例也

太陰經病證治二條

太陰中風四肢煩疼陽微陰濇而長者爲欲愈

此太陰自中風邪之證不從陽經來也夫太陰脾
也風陽邪也脾主行氣于四肢而風淫爲末疾故
太陰中風四肢煩熱而疼痛也脈陽微陰濇而長
者陽無病而陰受邪而濇又爲邪氣之將衰長爲

正氣之方盛正盛邪衰故爲欲愈

太陰病脈浮者可發汗宜桂枝湯

太陰脈浮有二義或風邪中于太陰之經其脈則浮或從陽經轉入太陰旋復反而之陽者其脈亦浮浮者病在經也凡陰病在藏者宜溫在經者則宜汗如少陰之麻黃附子細辛厥陰之麻黃升麻皆是也桂枝湯甘辛入陰故亦能發散太陰之邪

太陰經藏俱病一條

下利腹脹滿身體疼痛者先溫其裏乃攻其表溫裏宜四逆湯攻表宜桂枝湯

此條叔和本列厥陰篇中今移置此

此太陰經藏並受寒邪之證叔和編入厥陰經中者誤也下利腹脹滿裏有寒也身體疼痛表有寒也然必先溫其裏而後攻其表所以然者藏氣不充則外攻無力陽氣外泄則裏寒轉增自然之勢也而四逆用生附則寓發散于溫補之中桂枝有甘芍則兼周裏于散邪之內用法之精如此

太陰病愈期一條

大陰病欲解時從亥至丑止

六經邪解之時必守其經王之時太陰者土也土

王於辰戌丑未而獨于亥子丑時解者脾爲陰土
應王于陰故其病欲解必從亥至丑上也

張仲景傷寒論貫珠集卷之七

欽鶴山人尤怡在涇註 二然朱陶性校

少陰篇

論列少陰條例大意

少陰爲太陽之裏居厥太二陰之間故有邪在太陽而已內及少陰者有寒中少陰而仍外連太陽者有邪在少陰而或兼厥陰或兼太陰者大抵連太陰者多發熱連厥陰者多厥利也是傳經直中之外又有不同如此且也直中之寒久亦化熱傳經之熱極必生陰茲篇先列脈證于前次清法次

溫法又次爲生死法欲學者明辨宜清宜溫之實
不必但泥傳經直中之名也又其次爲少陰病禁
以少陰爲汗下之例亦不得不著汗下之禁云凡
四十五條爲一卷

少陰諸法

少陰脈證四條

少陰之爲病脈微細但欲寐也

經脈陽淺而陰深陽大而陰小邪傳少陰則脈之浮者轉爲微大者轉爲細也又多陽者多寤多陰者多寐邪傳少陰則目不瞑者轉而爲但欲寐也夫少陰者三陰之樞也陽於是乎入而陰于是乎出故雖太陰厥陰同爲陰藏而其爲病實惟少陰爲然而少陰之爲病亦非獨脈微細但欲寐二端仲景特舉此者以爲從陽入陰之際其脈證變見

貫珠集卷七 少陰諸法

有如此

少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也

此少陰自受寒邪之證不從陽經來也寒初到經欲受不可欲却不能故欲吐不吐心煩但欲寐而實不能寐也至五六日自利而渴則其邪已入少陰之藏矣然少陰陰藏也寒陰邪也以陰受陰法當不渴而渴者此非有熱以藏虛故引水自救耳

更審其小便若色白者則少陰寒病全體大露無疑何以言之熱傳少陰自利而渴者邪熱足以消水其小便色必赤寒中少陰自利而渴者雖能飲而不能制其小便色必白也仲景辨證之精如此病人脈陰陽俱緊反汗出者亡陽也此屬少陰法當咽痛而復吐利

陰陽俱緊太陽傷寒之脈也法當無汗而反汗出者表虛亡陽其病不屬太陽而屬少陰矣少陰之脈上膈循喉嚨少陰之藏爲胃之關爲二陰之司寒邪直入經藏俱受故當咽痛而復吐利也此爲

寒傷太陽陽虛不任因遂轉入少陰之證蓋太陽者少陰之表猶唇齒也唇亡則齒寒陽亡則陰及故曰少陰之邪從太陽飛渡者多也

少陰病八九日一身手足盡熱者以熱在膀胱必便血也

此熱傳少陰而復還入膀胱之證膀胱者太陽也太陽爲三陽之表而多血少氣熱在膀胱則一身手足盡熱而熱氣有餘血爲熱迫散而下行則必便血也

少陰清法七條

少陰病得之二三日以上心中煩不得卧黃連阿膠湯主之

少陰之熱有從陽經傳入者亦有自受寒邪久而變熱者曰二三日以上謂自二三日至五六日或八九日寒極而變熱也至心中煩不得卧則熱氣內動盡入血中而諸陰蒙其害矣蓋陽經之寒變則熱歸於氣或入于血陰經之寒變則熱入於血而不歸于氣此余歷試之驗也故用黃連黃芩之苦合阿膠芍藥雞子黃之甘併入血中以生陰氣而除邪熱成氏所謂陽有餘以苦除之陰不足以

甘補之是也

黃連阿膠湯方

黃連四兩 黃芩一兩 芍藥二兩 阿膠三兩

雞子黃二枚

右五味以水五升先煮三物取二升去滓內阿膠烱盡小冷內雞子黃攪令相得溫服七合日

三服

少陰病四逆其人或咳或悸或小便不利或腹中痛或泄利下重者四逆散主之

四逆四肢逆冷也此非熱厥亦太陽初受寒邪水

鬱爲熱而便入少陰之證少陰爲三陰之樞猶少
陽爲三陽之樞也其進而入則在陰退而出則就
陽邪氣居之有可進可退時上時下之勢故其爲
病有或咳或悸或小便不利或腹中痛或泄利下
重之證夫邪在外者可引而散之在內者可下而
去之其在外內之間者則和解而分消之分消者
半從外半從內之謂也故用柴胡之辛揚之使從
外出枳實之苦抑之使其內消而其所以能內能
外者則樞機之用爲多故必以芍藥之酸益其陰
甘草之甘養其陽曰四逆者因其所治之病而命

之名耳而其制方大意亦與小柴胡相似四逆之
柴胡枳實猶小柴胡之柴胡黃芩也四逆之芍藥
甘草猶小柴胡之人參甘草也且枳實兼擅滌飲
之長芍亦備營衛兩和之任特以爲病有陰陽
之異故用藥亦分氣血之殊而其輔正逐邪和解
表裏則兩方如一方也舊謂此爲治熱深發厥之
藥非是夫果熱深發厥則屬厥應下之之例矣豈
此藥所能治哉

四逆散方

柴胡

枳實破水漬炙乾

芍藥

甘草炙

右四味各十分搗篩白飲和服方寸七日三服
歟者加五味子乾薑各五分并主下利

成氏曰肺寒氣逆則欬五味子之酸收逆氣乾薑
之辛散肺寒并主下利者肺與大腸爲表裏上欬
下利治則頗同

悸者加桂枝五分

悸者寒多心脈不通則心下鼓也桂枝辛溫入心
通陽氣

小便不利者加茯苓五分

小便不利水聚於下也茯苓甘淡利竅滲水

腹中痛者加附子一枚炮令拆

腹中痛寒勝于裏也附子辛溫散寒止痛

泄利下重者先以水五升煮薤白三升煮取三升去滓以散三方寸匕內湯中煮取一升半分溫再服

泄利下重寒滯于下也薤白辛溫散寒通陽氣

少陰病下利六七日欬而嘔渴心煩不得眠者猪苓湯主之

少陰中寒下利至六七日寒變爲熱而氣復上行爲欬爲嘔爲渴爲心煩不得眠所謂下行極而上也夫邪氣自下而上者仍須從下引而出之猪苓

茯苓澤瀉滑石並甘淡下行之藥足勝導水泄熱
之用然以陰病而屬邪熱設非得阿膠之鹹寒入
陰何以馭諸陽藥而泄陰中之熱導浮上之氣哉
少陰病下利咽痛胸滿心煩者猪膚湯主之

少陰之脈從腎上貫肝膈入肺中循喉嚨其支別
者從肺出絡心注胸中陽邪傳入少陰下爲泄利
上爲咽痛胸滿心煩熱氣充斥脈中不特泄傷本
藏之氣亦且消燦心肺之陰矣猪水畜而膚甘寒
其氣味先入少陰益陰除客熱止咽痛故以爲君
加白蜜之甘以緩急潤以除燥而煩滿愈白粉之

甘能補中溫能養藏而泄利止矣

豬膚湯方

豬膚一觔以水一斗煮取五升去滓加白蜜一升
白粉五合熬香和相得溫分六服

少陰病咽中傷生瘡不能語言聲不出者苦酒湯主
之

少陰熱氣隨經上冲咽傷生瘡不能語言音聲不
出東垣所謂少陰邪入于裏上接於心火俱化
而尅金也故與半夏之辛以散結熱止咽痛雞子
白甘寒入肺清熱氣通聲音苦酒苦酸消瘡腫散

邪毒也

苦酒湯方

半夏十四枚洗破如棗核大 雞子一枚去黃內
上苦酒著雞子殼中內半夏著苦酒中以雞子殼
置刀環中安火上令三沸去滓少少含嚥之不瘥
更作三劑服之

少陰病二三日咽痛者可與甘草湯不差者與桔梗
湯

此亦熱傳少陰而上爲咽痛之法甘草湯甘以緩
急寒以除熱也其甚而不瘥者則必以辛發之而

以甘緩之甘草桔梗甘辛合用而甘勝于辛治陰
虛客熱其法輕重當如是耳

甘草湯方

甘草二兩以水三升煮取一升半去滓溫服七合
日二服

桔梗湯方

桔梗一兩 甘草二兩

右二味以水二升煮取一升去滓分溫再服
少陰病咽中痛半夏散及湯主之

少陰咽痛甘不能緩者必以辛散之寒不能除者

必以溫發之蓋少陰客邪鬱聚咽喉之間既不得
出復不得入設以寒治則聚益甚投以辛溫則鬱
反通內經微者逆之甚者從之之意也半夏散及
湯甘辛合用而辛勝於甘其氣又溫不特能解客
寒之氣亦能劫散咽喉怫鬱之熱也

半夏散及湯方

半夏洗 桂枝去皮 甘草炙各等分

已上三味各別搗篩已合治之白飲和服方寸
七日三服若不能散服者以水一升煎七沸內
散兩方寸匕更煎三沸下火令小冷少少嚥之

少陰下法三條

少陰病得之二三日口燥咽乾者急下之宜大承氣湯

此少陰熱併陽明之證二三日爲病未久而便口燥咽乾熱氣盛而陰氣少矣蓋陽明土少陰水熱併陽明則土實而水虛不特熱氣傷陰卽土氣亦傷水也故宜急下以瀉土而全水不然熱盛傷陰土實亦傷陰其乾槁可立而待然非心下痛腹脹不大便如下二條所云亦未可以大承氣輕試也少陰病自利清水色純青心下必痛口乾燥者急下

此亦少陰熱併陽明而氣復下注之證然雖下注而邪實不去但水液從旁下轉爲自利清水而已故心下痛而口乾燥也色純青者土受水邪立黃合色而色轉純青也以大承氣急下則胃實去而腎病亦已矣

少陰病六七日腹脹不大便者急下之宜大承氣湯腹脹不大便土實之徵也土實則水乾故非急下不可夫陽明居中土也萬物所歸故無論三陽三陰其邪皆得還入于胃而成可下之證然太陰傳

陽明臟邪還府爲欲愈也厥陰傳陽明者木邪歸
土不能復木也惟少陰則腎邪入胃而胃實復將
消腎故雖並用下法而少陰之法視太陰厥陰爲
加峻矣

少陰溫法十五條

少陰病始得之反發熱脈沉者麻黃附子細辛湯主
之

此寒中少陰之經而復外連太陽之證以少陰與
太陽爲表裏其氣相通故也少陰始得本無熱而
外連太陽則反發熱陽病脈當浮而仍繫少陰則

脈不浮而沉故與附子細辛湯溫少陰之經麻黃
兼發太陽之表乃少陰經溫經散寒表裏兼治之
法也

麻黃附子細辛湯方

麻黃二兩去節 附子一枚炮去皮破八片

細辛二兩

右二味以水一斗先煮麻黃減二升去上沫內
諸藥煮取三升去滓溫服一升日三服

按陽證有在經不在府者陰病亦有在經不在藏
者太陽篇云脈浮者桂枝湯少陰篇始得之反發

熱脈沉者麻黃附子細辛湯及得之二三日麻黃附子甘草湯厥陰篇厥陰中風脈微浮爲欲愈此皆陰病之在經而未入於藏者

少陰病得之二三日麻黃附子甘草湯微發汗以二三日無裏證故微發汗也

少陰中寒二三日爲脈沉惡寒無熱之時故可與麻黃附子甘草湯以取微汗而散寒邪無裏證者無吐利心煩不得卧等證也以二三日病未入藏而寒亦未變熱故得用溫經散邪之法如麻黃附子細辛之例然去細辛之辛而加甘草之甘于法

爲較和矣所以然者寒邪不可不發而陰病又不
可過發耳

麻黃附子甘草湯方

麻黃二兩去節 附子一枚炮去皮

甘草二兩炙

右三味以水七升先煮麻黃一二沸去上沫內

諸藥煮取三升去滓溫服一升日三服

少陰病得之一二日口中和其背惡寒者當灸之附
子湯主之

口中和者不燥不渴爲裏無熱也背惡寒者背爲

陽而陰乘之不能通于外也陽不通故當灸之以
通陽痺陽不足故主附子湯以補陽虛非如麻黃
附子細辛之屬徒以溫散爲事矣此陽虛受寒而
虛甚於寒者之治法也

按元和紀用經云少陰中寒而背惡寒者口中則
和陽明受熱而背惡寒者則口燥而心煩一爲陰
寒下乘陽氣受傷一爲陽熱入裏津液不足是以
背惡寒雖同而口中和與燥則異此辨證之要也
附子湯方

附子二枚炮去皮破八片 茯苓 芍藥各三兩

人參二兩 白朮四兩

右五味以水八升煮取三升去滓溫服一升日
三服

氣虛者補之必以甘氣寒者溫之必以辛甘辛合
用足以助正氣而散陰邪人參白朮茯苓附子是
也而病屬陰經故又須芍藥以和陰氣且引附子
入陰散寒所謂導之兵也

少陰病身體痛手足寒骨節痛脈沉者附子湯主之
身體痛骨節痛寒在陰也手足寒脈沉病屬陰也
若脈浮而手足熱則爲太陽傷寒可與汗解者矣

此爲少陰血氣不足而寒邪侵之之證故亦宜附
子湯復陽散陰益精氣也

少陰病二三日不已至四五日腹痛小便不利四肢
沉重疼痛自下利者此爲有水氣其人或欬或小便
利或下利或嘔者其武湯主之

少陰中寒二三日不已至四五日邪氣遞深而藏
受其病矣藏寒故腹痛寒勝而陽不行故小便不
利于是水寒相搏浸淫內外爲四肢沉重疼痛爲
自下利皆水氣乘寒氣而動之故也其人或欬或
小便利或下利或嘔者水寒之氣或聚或散或上

三服

後加減法

若欬者加五味子半升細辛乾薑各一兩

欬者水寒射肺氣逆而不下也成氏曰五味子之酸以收逆氣細辛乾薑之辛以散水寒

若小便利者去茯苓

小便利者水已下趨不必更利其水故去茯苓

若下利者去芍藥加乾薑二兩

下利者寒盛於內也故去芍藥加乾薑避寒而就溫也

若嘔者去附子加生薑足前成半助

嘔者氣逆于上也故去附子加生薑一物辛熱則同而生薑善降逆附子能行而不能下則不同也少陰病下利清穀裏寒外熱手足厥逆脈微欲絕身反不惡寒其人面赤色或腹痛或乾嘔或咽痛或利止脈不出者通脈四逆湯主之

此寒中少陰陰盛格陽之證下利清穀手足厥逆脈微欲絕者陰盛於內也身熱不惡寒面赤色格陽於外也爲真陽之氣被陰寒所迫不安其處而邊散於外故顯諸熱象而實非熱也通脈四逆卽

四逆加乾薑一倍爲陰內陽外脈絕不通故增辛熱以逐寒邪寒去則陽復反而脈復出耳故曰其脈卽出者愈

通脈四逆湯方

甘草二兩炙 附子大者一枚生用去皮破八片
乾薑三兩強人可四兩

右三味以水三升煮取一升二合去滓分溫再服其脈卽出者愈

面色赤者加蔥九莖

面色赤陽格於上也葱中空味辛能通陽氣

腹中痛者去葱加芍藥二兩

腹中痛陰滯於裏也芍藥味酸能利陰氣止腹痛
故加之葱通陽而不利陰故去之

嘔者加生薑二兩

嘔者陰氣上逆也生薑之辛可散陰而降逆

咽痛者去芍藥加桔梗一兩

咽痛者陽氣上結也桔梗之辛可開陽結去芍藥
者惡其收也

利止脈不出者去桔梗加人參二兩

利止脈不出亡血也故不利桔梗之散而利人參

之甘而能補也

少陰病飲食入口則吐心中溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也急溫之宜四逆湯胃者胃之關也關門受邪上逆於胃則飲食入口卽吐或心中溫溫欲吐而復不能吐也夫下氣上逆而爲吐者原有可下之例如本論之噦而腹滿視其前後知何部不利者而利之金匱之食已卽吐者大黃甘草湯主之是也若始得之手足寒脈弦遲者胸中邪實而陽氣不布也則其病不在下

而在上其治法不可下而可吐所謂因其高者而越之也若膈上有寒飲而致乾嘔者則復不可吐而可溫所謂病痰飲者當以溫藥和之也故實可下而胸中實則不可下飲可吐而寒飲則不可吐仲景立法明辨詳審如此

少陰病脈沉者急溫之宜四逆湯

此不詳何證而但憑脈以論治曰少陰病脈沉者急溫之宜四逆湯然苟無厥逆惡寒下利不渴等證未可急與溫法愚謂學者當從全書會通不可拘于一文一字之間者此又其一也

少陰病下利脈微清嘔而汗止數更衣反少者當溫其上灸之

少陰病下利脈微瀉陰傷於下也嘔而汗出陽虛於上也陰陽並傷法必上下並溫矣若更衣雖數而所下無多尤爲陰亡之驗是但當溫其上而不可溫其下卽溫上之法亦不可以藥傷其陰而但宜灸以引其陽也灸法未詳

少陰病吐利手足厥冷煩躁欲死者梔子黃湯主之此寒中少陰而復止攻陽明之証下利厥冷煩躁欲死者陰邪盛也下利脈微者以梔子黃湯溫

裏散寒爲主而既吐利中氣必傷故以人參大
棗益虛安中爲輔也然後條云少陰病吐利煩躁
四逆者死此復以吳茱萸湯主之者彼爲陰極而
陽欲絕此爲陰盛而陽來爭也病證則同而辨之
於爭與絕之間蓋亦微矣或云先厥冷而後煩躁
者陽欲復而來爭也先煩躁而四逆者陽不勝而
欲絕也亦通郭白雲云四逆而煩躁者不問其餘
證先宜服吳茱萸湯四逆而不煩躁者先宜服四
逆湯四逆下利脈不出者先宜服通脈四逆湯此
三者治少陰之大法也

少陰病下利白通湯主之 少陰病下利脈微者與
白通湯利不止厥逆無脈乾嘔煩者白通加豬膽汁
湯主之服湯脈暴出者死微續者生

少陰病下利脈微者寒邪直中陽氣暴虛既不能
固其內復不能通於脈故宜薑附之辛而溫者破
陰固裏葱白之辛而通者入脈引陽也若服湯已
下利不止而反厥逆無脈乾嘔煩者非藥之不中
病也陰寒太甚上爲格拒王太僕所謂甚大寒熱
必能興達性者爭雄異氣者相格也故卽於白通
湯中加人尿之酸寒豬膽汁之苦寒反其佐以同

其氣使不相格而適相成內經所謂寒熱溫涼反
從其病是也脈暴出者無根之陽發露不遺故死
脈微續者被抑之陽來復有漸故生

白通湯方

葱白四莖 乾薑一兩 生附子一枚去皮破
右三味以水三升煮取一升去滓分溫再服
白通加豬膽汁湯方

葱白四莖 乾薑一兩 豬膽汁一合

人尿五合 附子一枚去皮破八片

以上三味以水三升煮取一升去滓內人尿豬

膽汁和令相得分溫再服若無膽亦可用

少陰病下利便膿血者桃花湯主之 少陰病二三

日至四五日腹痛小便不利下利不止便膿血者桃

花湯主之 少陰病下利便膿血者可刺

少陰病下利便膿血者藏病在陰而寒復傷血也

血傷故腹痛陰病故小便不利與陽經挾熱下利

不同故以赤石脂理血固脫乾薑溫裏散寒粳米

安中益氣用刺法者以邪陷血中刺之以行血散

邪耳刺法未詳

桃花湯方

赤石脂一觔一半全用一半篩末 乾薑一兩
粳米一升

右三味以水七升煎米令熟去滓溫服七合內
赤石脂末方寸匕日三服若一服愈餘勿服

少陰生死法十二條

少陰中風脈陽微陰浮者爲欲愈

少陰中風者少陰之經自中風邪不從陽經傳入
者也脈陽微者邪氣微陰浮者邪氣淺而裏氣和
故爲欲愈亦陰病得陽脈則生也

少陰病欲解從子至寅止

少陰水藏也少陰之病陰邪也水王于子而陽長
于寅少陰病欲解從子至寅者陰氣待子則王
而陰邪得陽則解也

少陰病脈緊至七八日自下利脈暴微手足反溫脈
緊反去者爲欲解也雖煩下利必自止

寒傷少陰之經手足厥冷而脈緊至七八日邪氣
自經入藏自下利而脈微其病爲較深矣乃手足
反溫脈緊反去者陽氣內充而陰邪不能自容也
故爲欲解雖煩下利必自止者邪氣轉從下出與
太陰之穢腐當去而下利者同意設邪氣盡則煩

與利亦必自止耳

少陰病下利若利自止惡寒而踰卧手足溫者可治
少陰病惡寒而踰時自煩欲去衣被者可治

少陰病吐利手足不逆冷反發熱者不死脈不至者
灸少陰七壯

寒中少陰或下利或惡寒而踰卧或吐利交作而
脈不至陰邪盛而陽氣衰之候也若利自止手足
溫或自煩欲去衣被或反發熱則陽氣已復而陰
邪將退故皆得不死而可治脈不至者吐利交作

尺

無脈脈乍不至也灸少陰以引陽氣脈必自

至總之傳經之病以陰氣之存亡爲生死直中之病以陽氣之消長爲生死也

少陰病惡寒身踈而利手足逆冷者不治

少陰病四逆惡寒而身踈脈不至不煩而踈者死

惡寒身踈而利手足逆冷陰氣太盛陽氣不振與

前利止手足溫等證正相反蓋手足溫時自煩發

熱者陽道長陰道消也手足逆冷不煩而踈者陰

氣長陽氣消也且四逆而脈不至與手足溫而脈

不至者不同彼則陽氣乍厥引之卽出此則陽氣

已絕招之不返也而煩與踈又不同煩者熱而煩

也躁者亂而不必熱也煩而躁者陽怒而與陰爭期在必勝則生不煩而躁者陽不能戰復不能安而欲散去則死也

少陰病吐利煩躁四逆者死

寒中少陰吐利交作陰邪已太盛矣然或自煩發熱或手足不逆冷則陽氣猶在陰邪雖盛猶或可治所謂吐利手足不逆冷反發熱者不死也若更煩躁四逆則陽氣有散亡之象陰邪無退舍之期雖欲不死烏可得耶

少陰病下利止而頭眩時時自冒者死

下利止非利自愈也藏陰盡也眩目黑而轉也胃
昏冒也陰氣既盡孤陽無附而浮亂於上故頭眩
時時自冒也而陰氣難以卒復孤陽且易上散雖
有良藥亦無及矣是以少陰病陽復利止則生陰
盡利止則死也

少陰病六七日息高者死

息高氣高而喘也少陰爲真氣之源呼吸之根六
七日病不愈而息高者邪氣不去體而真氣已離
根也故死

少陰病脈微細沉但欲臥汗出不煩自欲吐至五六

日自利復煩躁不得卧寐者死

脈微細沉但欲卧邪傳少陰之本證如本篇第一條所云也汗出不煩者氣外泄而邪不與俱泄也自欲吐繼後自利者邪上下行而氣不能驅而出之也至煩躁不得卧寐則陰陽盡虛邪氣獨盛正不勝邪躁擾不寧頃之離散而死矣所謂病勝藏者死是也

少陰病禁四條

少陰病脈細沉數病爲在裏不可發汗

少陰與太陽爲表裏而少陰亦自有表裏經病爲

在表藏病爲在裏也脈沉而身發熱爲病在表脈
細沉數身不發熱爲病在裏病在表者可發汗如
麻黃附子細辛湯之例是也病在裏而汗之是竭
其陰而動其血也故曰不可發汗

少陰病脈微不可發汗亡陽故也陽已虛尺脈弱瀉
者復不可下之

少陰雖爲陰藏而元陽寓焉故其病有亡陽亡陰
之異脈微者爲亡陽脈弱瀉者爲亡陰發汗則傷
陽故脈微者不可發汗下則傷陰故陽已虛而尺
脈弱瀉者非特不可發汗亦復不可下之也

少陰病但厥無汗而強發之必動其血未知從何道出或從口鼻或從目出是名下厥上竭爲難治

少陰中寒但厥無汗邪方內淫而氣不外違非可得汗愈者而強發之則汗必不出而血反自動或口鼻或目隨其所攻之道而外出也蓋發汗之藥其氣上行而性多慄悍不得於氣則去而之血必盡其性而後止耳然既藏虛邪入以致下厥而復迫血妄動以致上竭上下交征而血氣之存者無幾矣尙何以藥邪而却疾耶故曰難治

少陰病欬而下利諸語者被火氣劫故也小便必難

以強責少陰汗也

少陰之邪上逆而欬下注而利矣而又復譫語此
非少陰本病乃被火氣劫奪津液所致火劫卽溫
鍼灼艾之屬少陰不當發汗而強以火劫之不特
竭其腎陰亦併耗其胃液胃乾則譫語腎燥則小
便難也

卷七終

黃芩集卷七 少陰諸法

十四

張仲景傷寒論貫珠集目錄卷八

辨別厥陰條列大意

厥陰諸法 計六十二條 方十道

厥陰病脈證五條

厥熱進退之機九條

厥陰生死微甚之辨十五條

厥陰清法五條

白頭翁湯方

麻黃升麻湯方

厥陰溫法十條

烏梅丸方

當歸四逆湯方

當歸四逆加吳茱萸生薑湯方

乾薑黃連黃芩人參湯方

厥陰病禁二條

厥陰簡誤九條

瘥後諸病七條

燒裯散方

枳實梔子豉湯方

牡蠣澤瀉散方

竹葉石膏湯方

目錄終

張仲景傷寒論貫珠集卷之八

臥鶴山人尤怡在涇註 二然朱陶性校

厥陰篇

辨列厥陰條例大意

厥陰爲陰之盡爲藏之極陰極而盡則必復反而
之陽故厥陰之生死在厥熱之進退也本篇於厥
陰脈證之下先辨厥熱進退所以明生死之機次
論生死微甚所以明陰陽之故也而厥陰有熱慮
其傷陰必以法清之厥陰有寒慮其傷陽必以法
溫之一如少陰之例也蓋厥陰少陰同爲陰藏而

俱屬陽火故於二者羣分類聚欲學者明辨而深思之耳其次爲厥陰汗下諸禁蓋欲蒙其利不可不知其害也其次爲厥陰簡誤以厥陰篇中雜入太陰少陰太陽之文傳誤已久習焉不察特檢出之其次爲差後勞復等法則去疾者莫若盡之意也凡六十二條爲一卷

厥陰諸法

厥陰病脈證五條

厥陰之爲病消渴氣上衝心心下疼熱飢而不欲食食則吐蚘下之利不止

傷寒之病邪愈深者其熱愈甚厥陰爲陰之盡而風木之氣又足以生陽火而餘陽津津虛火實藏燥無液求救於水則爲消渴消渴者水入不足以制熱而反爲熱所消也氣上衝心心中疼熱者火生於木肝氣逆心也飢而不欲食者木喜攻土胃虛求食而邪熱復不能消穀也食入卽吐蚘者蚘

無食而動聞食臭而出也下之利不止者胃家重傷而邪熱下注也此厥陰在藏之的證病從陽經傳入者也

傷寒四五日腹中痛若轉氣下趨少腹者此欲自利也

傷寒四五日正邪氣傳裏之時若腹中痛而滿者熱聚而實將成可下之證茲腹中痛而不滿但時時轉氣下趨少腹者熱不得聚而從下注將成下利之候也而下利有陰陽之分先發熱而後下利者傳經之熱邪內陷此爲熱利必有內煩脈數等

證不發熱而下利者直中之陰邪下注此爲寒利
必有厥冷脈微等證要在審問明白也

下利寸脈反浮數尺中自濇者必圖膿血

此陽邪入裏而作下利之證寸浮數者陽邪強也
尺中濇者陰氣弱也以強陽而加弱陰必圖膿血
下利脈沉而遲其人面少赤身有微熱下利清穀者
必鬱冒汗出而解病人必微厥所以然者其面戴陽
下虛故也

下利清穀脈沉而遲陰在裏在下也面少赤身有
微熱陽在上在外也夫陰內陽外而爲病者必得

陽入陰出而後解而面雖赤而未甚身雖熱而亦微則其陽之發露者僅十之三而潛藏者尙十之七也藏而能動必當與陰相爭爭而未勝則鬱胃爭而既勝則汗出汗出而內伏之陰從外出外出之陽從內入而病乃解矣然此證下虛無氣中土不守惟藉君主之靈以收散亡之氣而驅沉伏之陰鬱胃汗出則心君震怒之候也譬之瀆淵之役苟非真宗銳意親征則契丹大舉之寇必不能却然而安危反掌中外震驚病人所以必微厥也設非下虛之故何至危殆若是然或真陽畢露則必

不能與邪爭不爭亦必無幸矣

病者手足厥冷不結胸少腹滿按之痛者此冷結在膀胱關元也

手足厥冷原有陰陽虛實之別若其人結胸則邪結于上而陽不得通如後所云病人手足厥冷脈乍緊邪結在胸中當須吐之以通其陽者也若不結胸但少腹滿按之痛者則是陰冷內結元陽不振病在膀胱關元之間必以甘辛溫藥如四逆白通之屬以救陽氣而驅陰邪也

厥陰進退之機七條

傷寒一二日至四五日而厥者必發熱前熱者後必
厥厥深者熱亦深厥微者熱亦微厥應下之而反發
汗者必口傷爛赤

傷寒一二日至四五日正陰陽邪正交爭互勝之
時或陰受病而厥者勢必轉而爲熱陰勝而陽爭
之也或陽受病而熱者甚則亦變而爲厥陽勝而
陰被格也夫陽勝而陰格者其厥非真寒也陽陷
于中而陰見於外也是以熱深者厥亦深熱微者
厥亦微隨熱之淺深而爲厥之微甚也夫病在陽
者宜汗病在裏者宜下厥者熱深在裏法當下之

而反發汗則必口傷爛赤。蓋以溫隆之熱而被升浮之氣不從下出而從上逆故耳。

傷寒病厥五日熱亦五日。設六日當復厥。不厥者自愈。厥終不過五日以熱五日故知自愈。

傷寒厥五日熱亦五日者陰勝而陽復之也。至六日陰當復勝而厥。設不厥則陰退而邪解矣。故自愈。夫厥與熱陰陽消長之兆也。茲初病至終其厥不過五日而厥已而熱亦得五日。是其復之之數。當其勝之之數。所謂有陽則復無太過亦無不及。故知其病自愈也。

傷寒發熱四日厥反三日復熱四日厥少熱多其病
當愈四日至七日熱不除者其後必使膿血 傷寒
厥四日熱反三日厥復五日其病爲進寒多熱少陽
氣退故爲進也

熱已而厥者邪氣自表而之裏也乃厥未已而熱
之日又多于厥之日則邪復轉而之表矣故病當
愈其熱則除乃四日至七日而不除者其熱必侵
及營中而使膿血所謂熱氣有餘必發癰膿也厥
已而熱者陽氣復而陰邪退也乃熱未已而復厥
而厥又多於熱之日則其病爲進所以然者寒多

熱少陽氣不振則陰邪復勝也要之熱已而厥者
傳經之證慮其陽邪遲深也厥已而熱者直中之
證慮其陽氣不振也故傳經之厥熱以邪氣之出
入言直中之厥熱以陰陽之勝復言病證則同而
其故有不同如此學者能辨乎此則庶幾矣

傷寒先厥後發熱而利者必自止見厥復利

傷寒先厥者陰先受邪也後熱者邪從陰而出陽
也陰受邪而利及邪出而之陽故利必自止設復
厥則邪還入而之陰故必復利蓋邪氣在陽則生
熱在陰則爲厥與利自然之道也

傷寒始發熱六日厥反九日而利凡厥利者當不能食今反能食者恐爲除中食以索餅不發熱者知胃氣尙在必愈恐暴熱來出而復去也後三日脈之其熱續在者期至且日夜半愈所以然者本發熱六日厥反九日復發熱三日并前六日亦爲九日與厥相應故期至且日夜半愈後三日脈之而脈數其熱不罷者此爲熱氣有餘必發癰膿也

傷寒始發熱六日厥反九日而又下利者邪氣從陽之陰而盛於陰也陰盛則當不能食而反能食者恐爲除中中者胃中之陽氣也除去而盡之也

言胃氣爲邪氣所迫盡情發露不留餘蘊也不發
熱不字當作若謂試以索餅食之若果胃氣無餘
必不能蒸鬱成熱今反熱者知胃氣尙在非除中
之謂矣而又恐暴熱暫來而復去仍是胃陽發露
之凶徵也後三日脈之而其熱仍在則其能食者
乃爲胃陽復振無疑故期至旦日夜半其病當愈
所以然者本發熱六日厥反九日熱少厥多其病
當進茲復發熱三日并前六日亦爲九日適與厥
日相應故知其旦日夜半其病當愈且日猶明日
也然厥與熱者陰陽勝負之機不可偏也偏于厥

則陰勝而碍陽矣偏于熱則陽勝而碍陰矣後三日脈之而脈反加數熱復不止則陽氣偏勝必致傷及營血而發爲癰膿也

傷寒先厥後發熱下利必自止而反汗出咽中痛者其喉爲痺發熱無汗而利必自止者不止必便膿血便膿血者其喉不痺

傷寒之邪見於陽者不必見於陰見于下者不必見于上脈已而熱下利自止者陰邪轉而之陽也設得汗出其邪必解而咽中痛者未盡之熱厥而上行也故其喉爲痺發熱無汗者邪氣鬱而在陽

也雖下利法當自止而反不止者以無汗出熱仍從裏行也故必便膿血便膿血者其膿不溲邪在下者則不復在上也

傷寒熱少厥微指頭寒默默不欲食煩燥數日小便利色白者此熱除也欲得食其病爲愈若厥而嘔胸脇煩滿者其後必便血

熱少厥微指頭寒邪氣自微也默默不欲食煩燥邪欲傳裏也裏受邪而熱則其小便必不利雖利其色必不自至數日小便利色白知其熱已除也本默默不欲食忽欲得食知其胃已和也熱除胃

和其病則愈而厥陰之脈挾胃上膈布脇肋若其邪不解滯溢厥陰之位則爲厥而嘔爲胸脇煩滿也凡病上行極者必下行主血而病爲熱血爲熱但泄于下則其後必便血也

凡厥者陰陽氣不相順接便爲厥厥者手足逆冷是也

按經脈足之三陰三陽相接於足十指手之三陰三陽相接于手十指故陰之與陽常相順接者也若陽邪內入陰不能與之相接而反出於外則厥陰邪外盛陽不能與之相接而反伏于中亦厥是

二者雖有陰陽之分其爲手足逆冷一也

厥陰生死徵甚之辨十五條

厥陰中風脈微浮爲欲愈不浮爲未愈

此厥陰經自受風邪之證脈浮爲邪氣少浮爲病在經經病而邪少故爲欲愈或始先脈不微浮繼乃轉而爲浮者爲自陰之陽之候亦爲欲愈所謂陰病得陽脈者生是也然必兼有發熱微汗等候仲景不言者以脈該證也若不浮則邪著陰中必無出路其愈正未可期故曰不浮爲未愈

傷寒下利日十餘行脈反實者死

傷寒下利至日十餘行邪既未盡而正已大憊矣其脈當微或弱而反實者是邪氣有餘所謂病勝藏也故死

下利脈沉弦者下重也脈大者爲未止脈微弱數者爲欲自止雖發熱不死

沉爲裏爲下弦爲陰下利脈沉弦者陰邪在裏而盛于下故下重也脈大者邪氣盛經曰大則病進故爲未止脈微弱爲邪氣微數爲陽氣復陰寒下利陽復而邪微則爲欲愈之候雖復發熱亦是陽氣內充所致不得比于下利發熱者死之例也

下利有微熱而渴脈弱者令自愈 下利脈數有微熱汗出令自愈設復緊爲未解

此二條亦爲陰邪下注者設微熱而渴與脈數有微熱汗出並陽氣內充之象而脈弱又陰氣衰退之徵故令自愈夫脈弱者脈緊去而轉弱也設復緊則陰邪仍盛其病豈能遽已耶

下利脈數而渴者令自愈設不差必圜膿血以有熱故也

此亦陰邪下利而陽氣已復之證脈數而渴與下利有微熱而渴同意然脈不弱而數則陽之復者

已過陰寒雖解熱氣旋增將更傷陰而固膿血也
發熱而厥七日下利者爲難治

發熱而厥者身發熱而手足厥病屬陽而裏適虛
也至七日正漸復而邪欲退則當厥先已而熱後
除乃厥熱如故而反加下利是正不復而裏益虛
矣天病非陰寒則不可以辛甘溫其裏而內虛不
足復不可以苦寒堅其下此其所以爲難治也

傷寒發熱下利厥逆者死

傷寒發熱下利厥逆者邪氣從外之內而盛于內
也至是不得卧則陽氣有立亡之象故死此傳經

之邪陰氣先竭而陽氣後絕者也

傷寒發熱下利至甚厥不止者死

發熱甚下利厥逆證與上同而下利至甚則陰欲亡厥逆不止則陽亦傷雖不躁猶死也此亦傳經之邪陰先竭而陽後絕者也

傷寒六七日不利便發熱而利其人汗出不止者死有陰無陽故也

寒傷于陰至六七日發熱者陽復而陰解雖下利猶當自止所謂傷寒先厥後發熱而利者必自止也乃傷寒六七日本不下利而忽熱與利俱見此

非陽復而熱也陰內盛而陽外亡也若其人汗出
不止則不特不能內守亦并無爲外護矣是謂有
陰無陽其死必矣

下利手足厥冷無脈者灸之不溫若脈不還反微喘
者死

陰寒下利而至厥冷無脈陽氣將竭而死矣灸之
所以通既絕之陽乃厥不同脈不還而反微喘殘
陽上奔大氣下脫故死

下利後脈絕手足厥冷晬時脈還手足溫者生脈不
還者死

晡時過時也下利後脈絕手足厥冷者陰先竭而
陽後絕也是當俟其晡時經氣一週其脈當還其
手足當溫若脈不還其手足亦必不溫而死矣
傷寒六七日脈微手足厥冷煩躁灸厥陰厥不還者
死

傷寒六七日陽氣當復陰邪當解之時乃脈不浮
而微手足不煩而厥冷是陰氣反進而陽氣反退
也煩躁者陽與陰爭而陽不能勝之也灸厥陰所
以散陰邪而復陽氣陽復則厥自還設不還則陽
有絕而死耳是故傳經之邪至厥陰者陰氣不絕

則不死直中之邪入厥陰者陽氣不復則不生也
傷寒脈遲六七日而反與黃芩湯徹其熱脈遲爲寒
今與黃芩湯復除其熱腹中應冷當不能食今反能
食此名除中必死

脈數爲熱脈遲爲寒診家之大要也熱者清之寒
者溫之醫家之大法也乃傷寒脈遲至六七日而
不變其爲寒無疑矣而反與黃芩湯復除其熱是
以寒益寒也于是陽氣消亡陰寒獨勝法常腹中
冷而不能食今反能食者非胃氣盛也胃中之陽
已盡無餘腎之貧見誇富盛證所有而暴之于外

雖銜耀目前然其盡可立而待也故直斷之曰此
名除中必死

厥陰病欲解時從寅至卯上

厥陰屬風木之藏寅卯爲木王之時藏氣勝而邪
氣解亦如三陽及太少二陰之例也

厥陰清法五條

厥陰病渴欲飲水者少少與之愈

厥陰之病本自消渴雖得水未必卽愈此云渴欲
飲水少少與之愈者必厥陰熱邪還返陽明之候
也熱還陽明津液暴竭求救於水少少與之胃氣

則和其病乃愈若係厥陰則熱足以消水而水豈能消其熱哉

下利欲飲水者以有熱故也白頭翁湯主之

傷寒自汗不渴者爲藏有寒太陰自受寒邪也下利欲飲水者以裏有熱傳經之邪厥陰受之也白頭翁湯除熱堅下中有秦皮色青味苦氣涼性瀉能入厥陰清熱去濕而止利也

白頭翁湯方

白頭翁二兩 黃連 黃柏 秦皮各三兩

右四味以水七升煮取三升去滓溫服一升不

愈更服一升

熱利下重者白頭翁湯主之

傷寒熱邪入裏因而作利者謂熱利下重卽後重
熱邪下注雖利而不得出也白頭翁苦辛除邪氣
黃連黃柏秦皮苦以堅之寒以清之瀉以收之也
下利後更煩按之心下濡者爲虛煩也宜梔子豉湯
下利後更煩者熱邪不從下減而復上動也按之
心下濡則中無阻滯可知故曰虛煩香豉梔子能
徹熱而除煩得吐則熱從上出而愈因其高而越
之之意也

傷寒六七日大下後寸脈沉而遲手足厥逆下部脈不至咽喉不利吐膿血泄利不止者爲難治麻黃升麻湯主之

傷寒六七日寒已變熱而未實也乃大下之陰氣遂虛陽氣乃陷陽氣陷故寸脈沉而遲陰氣虛故下部脈不至陰陽並傷不相順接則手足厥逆而陽邪之內入者方上滯而下溢爲咽喉不利爲吐膿血爲泄利不止是陰陽上下並受其病而虛實冷熱亦復混淆不清矣是以欲治其陰必傷其陽欲補其虛必礙其實故曰此爲難治麻黃升麻湯

合補瀉寒熱爲劑使相助而不相悖庶幾各行其事而並呈其效方用麻黃升麻所以引陽氣發陽邪也而得當歸知母萎蕤天冬之潤則肺氣已滋而不蒙其發越之害矣桂枝乾薑所以通脈止厥也而得黃芩石膏之寒則中氣已和而不被其燥熱之烈矣其芍藥甘草茯苓白朮則不特止其泄利抑以安中益氣以爲通上下和陰陽之用耳

麻黃升麻湯方

麻黃二兩半去節 當歸 升麻各二兩一分

知母 黃芩 萎蕤各十八銖 石膏綿裹碎

白朮 乾薑 白芍 天冬去心 桂枝 茯苓
甘草炙各六銖

右十四味以水一斗先煮麻黃一二沸去上沫
內諸藥煮取三升去滓分溫三服相去如炊三
斗米飯頃令盡汗出愈

厥陰溫法九條

傷寒脈微而厥至七八日膚冷其人躁無暫安時者
此爲藏厥非蚘厥也蚘厥者其人當吐蚘今病者靜
而復時煩此爲藏寒蚘上入膈故煩須臾復止得食
而嘔又煩者蚘聞食臭出其人當自吐蚘蚘厥者烏

得九主之又主久痢

傷寒脈微而厥寒邪中於陰也至七八日身不熱而膚冷則其寒邪未變可知乃其人躁無暫安時者此爲藏厥發躁陽氣欲絕非爲虵厥也虵厥者虵動而厥其人亦躁但虵靜則躁亦自止虵動則時復自煩非若藏寒之躁無有暫安時也然虵之所以時動而時靜者何也虵性喜溫藏寒則虵不安而上膈虵喜得食藏虛則虵復上而求食甚則嘔吐涎液從口中出按古云虵得甘則動得苦則安又曰虵聞酸則靜得辛熱則止故以烏梅之酸

連栢之苦薑辛歸附椒桂之辛以安蛭溫藏而止
其厥逆加人參者以蛭動中虛故以之安中而止
吐且以御冷熱諸藥之悍耳

烏梅丸方

烏梅三百箇 連一觔 乾薑十兩 細辛
附子炮 桂枝 人參 黃栢各六兩 當歸
蜀椒各四兩

石十味異搗篩合治之以苦酒漬烏梅一宿去
核蒸之五升米下飯熟搗成泥和藥令相得內
臼中與蜜杵二千下丸如桐子大先食飲服十

丸日三服稍加至二十丸禁生冷滑物臭食等
乾嘔吐涎沫頭痛者吳茱萸湯主之

乾嘔吐涎沫者厥陰寒邪上攻陽明也頭痛者厥
陰之脈上出額與督脈會於巔寒氣隨經上入于
頭故痛也然頭者諸陽之會以陰邪而得干之其
陽不振甚矣故以吳茱萸辛熱入厥陰散寒邪爲
君生薑辛溫和胃止嘔吐爲臣人參大棗甘溫助
正氣養陽氣爲佐也

手足厥寒脈細欲絕者當歸四逆湯主之若其人內
有久寒者宜當歸四逆加吳茱萸生薑湯主之

手足厥寒脈微欲絕者陽之虛也宜四逆輩脈細
欲絕者血虛不能溫于四末并不能榮於脈中也
夫脈爲血之府而陽爲陰之先故欲續其脈必益
其血欲益其血必溫其經方用當歸芍藥之潤以
滋之甘草大棗之甘以養之桂枝細辛之溫以行
之而尤藉通草之入經通脈以續其絕而止其厥
若其人內有久寒者必加吳茱萸生薑之辛以散
之而尤藉清酒之濡經活血以散其久伏之寒也
當歸四逆湯方

當歸三兩

桂枝三兩

芍藥三兩

細辛二兩

通草二兩 甘草二兩炙 大棗二十枚

右七味以水八升煮取三升去滓溫服一升日
三服

當歸四逆加吳茱萸生薑湯方

當歸二兩 桂枝三兩 白芍二兩

細辛三兩 甘草二兩炙 通草二兩

大棗十二枚 吳茱萸二升 生薑半觔切

右九味以水六升清酒六升和煮取五升去滓

溫分五服一方水酒各四升

大汗出熱不去內拘急四肢疼又下利厥逆而惡寒

者四逆湯主之

此過汗傷陽病本熱而變爲寒之證大汗出熱不
去者邪氣不從汗解而陽氣反從汗亡也陽氣外
亡則寒冷內生內冷則脈拘急而不舒也四肢者
諸陽之本陽虛不足不能實氣於四肢則爲之疼
痛也甚至下利厥逆而惡寒則不特無與內守亦
并不爲外護矣故必以四逆湯救陽驅陰爲主余
謂傳經之熱久亦成陰者此類是也

大汗若大下利而厥逆者四逆湯主之

此亦陽病誤治而變陰寒之證成氏所謂大汗若

大下利表裏雖殊其亡津液損陽氣一也陽虛陰
勝則生厥逆雖無裏急下利等證亦必以救陽驅
陰爲急易曰履霜堅冰至陰盛之戒不可不凜也
傷寒脈促手足厥逆者可灸之

脈陽盛則促陰盛則結手足厥逆而脈促者非陽
之虛乃陽之鬱而不通也灸之所以引陽外出若
厥而脈微者則必更以四逆湯溫之豈特灸之哉
嘔而脈弱小便復利身有微熱見厥者難治四逆湯
主之

脈弱便利而厥爲內虛且寒之候則嘔非火邪乃

是陰氣之上逆熱非寒邪乃是陽氣之外越矣故以四逆湯救陽驅陰爲主然陰方上冲而陽且外越其離決之勢有未可卽爲順接者故曰難治或曰嘔與身熱爲邪實厥利脈弱爲正虛虛實互見故曰難治四逆湯舍其標而治其本也亦通

下利清穀裏寒外熱汗出而厥者通脈四逆湯主之挾熱下利者傷在太陰之陰中寒清穀者傷在少陰之陽裏寒外熱汗出而厥爲陰內盛而陽外之象故於四逆加乾薑一倍以溫裏而勝寒邪曰通脈者蓋欲使陽氣內行而厥與利俱止耳

傷寒厥而心下悸者宜先治水當服茯苓甘草湯却治其厥不爾水漬入胃必作利也

傷寒寒勝則厥心下有水則悸厥而心下悸者寒中於陰而水聚于心下也是宜以茯苓甘草湯先治其水水去然後治厥如傷寒二三日心中悸而煩者先服建中湯之意也建中者建立中氣恐其中虛而邪易入邪入則煩不止矣茯苓甘草湯甘淡利水益中氣恐其水漬入胃而作利利作則厥不同矣仲景治病每以正氣爲慮如此

傷寒本自寒下醫復吐下之寒格更逆吐下若食入

和卽吐乾薑黃連黃芩人參湯主之

傷寒本自寒下蓋卽太陰腹滿自利之證醫不知而復吐下之裏氣遂虛陰寒益甚胃中之陽被格而上逆脾中之陰被抑而下注得不倍增吐下乎至食入口卽吐則逆之甚矣苦以寒治逆則寒下轉增或僅投溫劑則必格拒而不入故以連芩之苦以通寒格參薑之溫以復正氣而逐陰邪也

乾薑黃連黃芩人參湯方

乾薑二兩 黃連三兩 黃芩三兩 人參三兩

右四味以水六升煮取二升去滓分溫再服

厥陰病禁二條

傷寒五六日不結胸腹濡脈虛復厥者不可下此爲亡血下之死

傷寒五六日邪氣傳裏在上則爲結胸在下則爲腹滿而實若不結胸腹濡而脈復虛則表裏上下都無結聚其邪爲已解矣解則其人不當復厥而反厥者非陽熱深入也乃血不足而不榮於四末也是宜補而不可下下之是虛其虛也玉函云虛者重瀉其氣乃絕故死

諸四逆厥者不可下之虛家亦然

按成氏曰四逆四肢不溫也厥者手足冷也然本篇云厥者手足逆冷是也又云傷寒脈促手足厥逆者可灸之其他凡言厥逆之處不一則四逆與厥本無分別特其病有陰陽之異耳此條蓋言陰寒厥逆法當溫散溫養之故云不可下之前條云厥應下之者則言邪熱內陷之厥逆也學者辨之厘家體虛不足之人也雖非四逆與厥亦不可下之經云母實實母虛虛而遣人天殃此之謂也

簡誤九條

嘔家有癰膿者不可治嘔膿盡自愈

癰膿者傷寒熱聚於胃口而不行則生腫癰而膿
從嘔出癰不已則嘔不止是因癰膿而嘔故不可
概以止嘔之藥治之膿盡癰已則嘔自止此胃癰
雜病當隸陽明不當入厥陰也以下九條均非厥
陰本病叔和不察誤編厥陰篇中茲特檢出另列
簡誤其他厥陰進退及下利嘔逆等證亦有不
定屬厥陰者叔和以爲不便清晰故總隸厥陰而
實爲三陰並有之證茲仍其舊學者當以意會之
傷寒大吐大下之極虛復極汗出者以其人外氣怫
鬱復與之水以發其汗因得噦所以然者胃中寒冷

故也

傷寒大吐大下之既損其上復傷其下爲極虛矣
縱有外氣拂鬱不解亦必先固其裏而後疎其表
乃復飲水以發其汗遂極汗出胃氣重虛水冷復
加治虛相搏則必作噦噦呃逆也此陽病誤治而
變爲寒冷者非厥陰本病也

病人手足厥冷脈乍緊者邪結在胸中心下滿而煩
飢不能食者病在胸中當吐之宜瓜蒂散

脈緊爲實乍緊者胸中之邪能結而不能實也夫
胸中陽也陽實氣於四肢邪結胸中其陽不布則

手足無氣而厥冷也而胃居心下心處胸間爲煩
滿爲飢而不能食皆邪結胸中逼處不安之故經
云其高者引而越之胸邪最高故當吐之瓜蒂苦
而也湧能吐胸中結伏之邪也此證不必定屬陰
經卽陽病亦有之也

傷寒歲而腹滿視其前後知何部不利利之愈

噦而腹滿者病在下而氣溢於上也與病人欲吐
不可下之者不同彼爲上行極而欲下此爲下行
極而復上也經曰在下者引而竭之故當視其前
後二陰知何部不利而利之則病從下出而氣不

上逆腹滿與噦俱去矣此熱入太陰而上攻陽明之證與厥陰無涉也

嘔而發熱者小柴胡湯主之

此邪在少陽之經非厥陰本病也故以小柴胡湯和解少陽之邪邪解則嘔與熱俱止或厥陰病而外連少陽者亦有之然亦必以小柴胡先解少陽爲急所謂病自內之外而盛於外者先解其外而後治其內也

下利譫語者有燥屎也宜小承氣

譫語者胃實之徵下利得此爲有燥屎所謂利者

不利是也與小承氣湯下其燥屎屎去藏通下利
自止經云通因通用此之謂也金匱治下利按之
心下堅者與大承氣湯與此同意所當互考此太
陰傳入陽明之證與厥陰無涉也

下利清穀不可攻表汗出必脹滿

清與周同卽完穀也乃陽不運而穀不腐也是當
溫養中土不可攻表出汗汗出則陽益虛陽虛則
氣不化故必脹滿此寒中太陰之證非厥陰病也
少陰負跌陽者爲順也

少陰腎脈也跌陽胃脈也下利爲上負水勝之病

少陰負跌陽者水負而土勝也故曰順此條當爲
太陰下利而設亦與厥陰無涉也

傷寒脈滑而厥者裏有熱也白虎湯主之

傷寒脈微而厥者陰邪所中寒在裏也脈滑而厥
者陽邪所傷熱在裏也陽熱在裏陰氣被格陽反
在內陰反在外設身熱不除則其厥不已故主白
虎湯以清裏而除熱也此陽明熱極發厥之證誤
編入厥陰者也

差後諸病七條

傷寒陰陽易之爲病其人身體重少氣少腹裏急或

引陰中拘攣熱上冲胸頭重不欲舉眼中生花膝脛拘急者燒視散主之

陰陽易者男子大病新差尙有餘熱婦人與之交而得病名曰陽易或婦人大病新差餘熱未盡男子與之交而得病者名曰陰易以陰陽相感精氣交通熱氣從之而傳易也其人身體重少氣者勞傷真氣而熱勝之也少腹裏急或引陰中拘攣及膝脛拘急者精虛熱入而脈道不通也熱上冲胸頭重不欲舉眼中生花則熱氣重蒸而且上消溺陽矣裊穡得陰濁最多以類相入導其熱氣俾從

陰而入者仍從陰而出也

燒裊散方

右取婦人中裊近隱處剪燒灰以水和服方寸
七日三服小便卽利陰頭微腫則愈婦人病取
男子裊燒灰服

大病差後勞復者枳實梔子散湯主之若有宿食者
加大黃如博碁子大五六枚

太病新差血氣未復餘熱未盡而強力作勞因復
發熱者名曰勞復爲其餘熱之氣因勞而外浮也
枳實梔子所以散熱也亦表裏之

劑而氣味輕薄適宜於病後復發之體耳若有宿食者名曰食復內經所謂食肉則復多食則遺也故于枳實梔子豉湯中少加大黃以逐其宿食

枳實梔子豉湯

枳實三枚炙 梔子十四枚擘 豉一升綿裹

右三味以清漿水七升空煮取四升內枳實梔子煮取二升下豉更煮五六沸去滓溫分再服覆令微似汗

傷寒差已後更發熱者小柴胡湯主之脈浮者以汗解之脈沉實者以下解之

傷寒差已後更發熱者不因作勞亦未過食而未盡之熱自從內而達於外也故與小柴胡湯因其勢而解之且人參甘草可以益病後之虛黃芩半夏可以和未平之裏也脈浮者邪氣連表汗之使之外解脈沉實者邪氣居裏下之使從裏解亦因其勢而利導之耳

大病差後從腰以下有水氣者牡蠣澤瀉散主之

大病新差而腰以下腫滿者此必病中飲水過多熱邪雖解水氣不行浸漬於下而肌肉腫滿也是當以急逐水邪爲法牡蠣澤瀉散降之力居多

飲服方寸匕不用湯藥者急藥緩用且不使助水
氣也若繫用補脾之法恐脾氣轉滯而水氣轉盛
寧不泛濫爲患

牡蠣澤瀉散方

牡蠣熬 澤瀉 括蕒根 葶藶熬 商陸根

蜜漆洗去腥 海藻洗去鹹各等分

右七味異搗下篩爲散更入日中治之白飲和
服方寸匕小便利止後服

大病差後喜唾久不了了者胃上有寒當以丸藥溫
之宜理中丸

大病差後胃陰虛者津液不生則口乾欲飲胃陽弱者津液不攝則口不渴而喜啜至久之而尚不了了則必以補益其虛以溫益其陽矣曰胃上有寒者非必有客氣也虛則自生寒耳理中丸補虛溫中之良劑不用湯者不欲以水氣資吐也

傷寒解後虛羸少氣氣逆欲吐者竹葉石膏湯主之
大邪雖解元氣未復餘邪未盡氣不足則因而生痰熱不除則因而上逆是以虛羸少食而氣逆欲吐也竹葉石膏湯乃白虎湯之變法以其少氣故加參麥之甘以益氣以其氣逆有飲故用半夏之

辛以下氣調飲且去知母之醎寒加竹葉之苦涼
尤於胃虛有熱者爲有當耳

竹葉石膏湯方

竹葉二把 石膏一觔 人參三兩 粳米半升
半夏半升洗 甘草二兩炙 麥冬一升去心
石七味以水一斗煮取六升去滓內粳米煮米
熟湯成去米溫服一升日三服

病人脈已解而日暮微煩以病新差人強與穀脾胃
氣尙弱不能消穀故令微煩損穀則愈

脈已解者病邪解而脈已和也微煩微熱也解則

不當復煩而日暮微煩者以病新差不當與穀而
強與之胃虛穀實不能勝之則發煩熱也損穀則
愈者謂不可以藥治之但損其穀食則胃自和耳